



STATEN VAN ARUBA

Na Presidente de Parlamento
mr. J.E. Thijsen
L.G. Smith Blvd 72
Oranjestad
ALHIER



Oranjestad, 10 di september 2018

Topico: Pregunta pa Minister di Turismo, Salud Publico y Deporte

Apreciado Señor Presidente,

Conforme articulo III.17 di Constitucion di Aruba y articulo 59 de Reglamento di Ordo di Parlamento, suscrito ta solicita pa manda e preguntanan adhunto pa Minister di Turismo, Salud Publico y Deporte cu e peticion pa nan wordo contesta por escrito.

Atentamente

drs. M.J. Lopez-Tromp



STATEN VAN ARUBA

Preguntanan pa Minister di Turismo, Salud Publico y Deporte:

1. Ki pasonan Minister ta tumando pa evita aumento di cambenan all inclusive?
2. Ki pasonan ministerio ta tumando pa evita cu ta sigui cu construccion di mas hotel riba nos isla?
3. AHATA a bati alarma cu Aruba ta birando demasiado caro pa nos bishitantenan. Cual ta opinion di Minister di Turismo riba esaki? Si ta comparti e opinion aki ki pasonan ta tumando? Si no ta comparti esaki con lo atende e situacion aki cu e asociacion en cuestion?
4. Ta iniciando temporada halto di turismo crucero, ta conoci cu a drecha algun beach pa por acapara e fluho di turista aki, pero ainda e no ta suficiente y tin hopi keho di sector hotelero riba dje. Con Ministerio ta bay atende cu e situacion aki?
5. San Nicolas keto bay ta sclamando pa atencion, turistanan ta yega Baby Beach, pero no ta stop den centro di San Nicolas. A scucha riba diferente plan cu tin y ta pidi Minister Oduber pa por favor splica con e avance di e plannan aki ta, cual lo ta e timeline y si tin un pronostico caba pa cu e efectividad di nan.
6. Con leu reinicio di Carubbian Festival ta? Ki cambionan por spera di e festival aki?
7. Con leu e proceso ta pa bin cu un hotel pariba di nos isla? Minister por splica cual ta e grupo(nan) interesa? Ki tipo di hotel lo por spera den e area aki? Cual lo ta e area designa pa construccion di hotel? Di cuanto camber lo ta papiando? Ki efecto esaki lo tin pa desaroyo turistico di San Nicolas y vecindario? Ki efecto e lo tin pa desaroyo turistico di nos isla? Con nos cultura, medio ambiente y economia lo wordo afecta door di un desaroyo asina?
8. Cual ta e situacion actual cu Fundacion Lotto pa Deporte?
9. A ser papia cu Minister lo bin cu un otro fundacion similar na esun di Lotto? Esaki ta berdad? Dicon e decision? Ki diferencia lo tin entre un cu otro? Con lo bay splica comunidad e situacion nobo?
10. Cual ta e stand van zaken di e veldnan rond di Aruba?
11. Constantemente por mira un cantidad di muchanan ta bende rifa of ta recauda fondo pa por biaha pa competencianan deportivo den exterior? Con ta controla esaki? Con e aporte di Fundacion Lotto pa Deporte ta wordo controla?
12. Diferente criticanan ta bin dilanti cu ta cierto deportenan so ta haya sosten di Fundacion Lotto pa Deporte. Con por yega na un reparticion mas husto di e fondonan pa deporte?
13. Minister por splica cual ta e situacion di renovacion y ampliacion di hospital?
14. Cuanto e meerkosten di e construccion ta?

15. Parlamento por haya copia di e rapport(nan) di Inspeccion na Hospital door di Inspectie Volksgezondheid? Tambe rapport (nan) di e mantencion na hospital caminda por wak e frecuencia y e enfoke di e trabounan di mantencion?
16. A bin dilanti cu na momento cu coriente bay, e cambernan di hospital ta bira insportabel door di e calor y cu no tin bentanan cu lo por habri. A busca un solucion pa cu esaki caba?
17. Un parti importante di cuidu medico ta prevencion. Ki atencion ta dunando na e aspecto aki?
18. E tempo di espera pa cierto specialistanan ta demasiado largo, ki solucion Minister Oduber ta mira pa reduci esaki lo maximo posibel?
19. Un di e puntonan den programa di gobernacion ta cu lo introduci e Arubig. Parlamento por ricibi copia di e instellingsbesluit di e comision cu a wordo instala pa bin cu un conseho y proposicion conhunto riba Arubig?
20. Den prensa recientemente e director saliente di AZV, cu ta un di e stakeholders den e comision pa Arubig, a bisa cu e comision ta den pleno discusion. Minister por duna un bista di e trabounan andando y si ta yegando na un consenso pa proposicion?

Sperando un contesta por escrito di Minister di Turismo, Salud Publico y Deporte riba mi preguntanan.

Atentamente



drs. M.J. Lopez-Tromp